


NEDIM TUNO, JUSUF TOPOLJAK, ADMIR MULAHSIĆ

**MONOGRAFIJA "VIŠA GEODETSKA ŠKOLA U SARAJEVU
1960 – 1974."**



Godine 2020. navršilo se 6 decenija od kada je na novootvorenoj Višoj geodetskoj školi u Sarajevu upisana prva generacija studenata. Time je, po prvi put u Historiji, započelo visokoškolsko obrazovanje geodetskih inženjera u Bosni i Hercegovini. Taj značajni jubilej bio je povod da mali tim entuzijasta – profesora sa Odsjeka za geodeziju i geoinformatiku Građevinskog fakulteta UNSA provede opsežne aktivnosti koje su rezultirale monografskom obradom djelovanja Škole, tokom 14 godina njenog postojanja. Namjera je bila javnosti pružiti što sveobuhvatniju sliku razvoja i rada te škole, koja je tokom 1960-ih i u prvoj polovini 1970-ih bila najviša institucija obrazovanja geodetskih kadrova u Bosni i Hercegovini. Odmah po osnivanju, Viša geodetska škola je na sebe preuzela odgovorne zadatke pripremanja adekvatnih stručnjaka za potrebe opsežnih geodetskih radova

širog Bosne i Hercegovine i s pravom se može reći da je ona tokom svog kratkog postojanja odigrala izuzetnu ulogu u sveukupnom razvoju bosanskohercegovačke geodezije.

Monografija pruža cjelovitiju sliku osnivanja, razvoja i rada Više geodetske škole u Sarajevu i donosi pregršt podataka temeljenih na neobjavljenoj građi i dosadašnjoj oskudnoj literaturi. Mnogobrojna dešavanja vezana za Školu je, obzirom na složenost te problematike, bilo veoma teško naučno rekonstruisati te kvalitetno i argumentovano objasniti. Osim detaljnog prikaza historijata Više geodetske škole tokom 14 godina njenog postojanja, vrijednost monografiji daju i popis svih uposlenih koji su na njoj radili, popis vanjskih saradnika, biografije stručnjaka koji su predavali geodetske predmete te popis svih diplomiranih studenata.

Monografija je pisana s namjerom da se popuni evidentna praznina u poznavanju naše geodetske obrazovne djelatnosti u prošlosti, sa željom da se postignuti izvanredni rezultati bosanskohercegovačkog geodetskog obrazovanja sačuvaju od zaborava. U tom kontekstu se izražava nada da će monografija pobuditi odgovarajuće zanimanje naučne, stručne i općenito šire kulturne javnosti.

Knjiga je izašla iz štampe u junu 2023. godine, u izdanju Saveza udruženja građana geodetske struke u Bosni i Hercegovini. Formata je B5, tvrdog uveza, a broji 132 stranice. Dodijeljen joj je ISBN 978-9926-8804-1-5.

Tomaž Ambrožič